



Broj/Broj: 03/1-50-1-9-3/07
Sarajevo/Сарајево: 23.4.2007. godine

Z A P I S N I K

3. sjednice Zajedničke komisije za odbranu i sigurnost BiH Parlamentarne skupštine BiH održane 23.4.2007., u vremenu od 10,00 do 13,30 sati

Sjednici su prisustvovali članovi Zajedničke komisije: Šefik Džaferović, Jozo Križanović, Drago Kalabić, Dušanka Majkić, Hazim Rančić, Sulejman Tihiić, Branko Zrno, Slobodan Šaraba i Mirko Okolić.

Sjednici, iz opravdanih razloga, nisu prisustvovali Vinko Zorić i Ivo Miro Jović.

Sjednici su prisustvovali predstavnici predlagača akata, kao i gosti:

- Momčilo Novaković, poslanik;
- Marina Pendeš, zamjenik ministra odbrane BiH;
- Sven Alkalaj, ministar vanjskih poslova BiH;
- Nedžad Hadžimusić, pomoćnik ministra, Edin Šehić i Momir Brajić iz Ministarstva vanjskih poslova BiH,
- Željko Knez, savjetnik Željka Komšića, člana Predsjedništva BiH;
- Brus McLane, savjetnik glavnokomandujućeg Štaba NATO-a u BiH, te Lejla Dizdarević, Jasmin Mekić i Elma Demir iz Štaba NATO-a u BiH;
- Christian Haupt, Jasna Dragičević i Dušan Zoller iz Misije OSCE-a u BiH;
- Dragica Hinić, sekretar Zajedničke komisije za odbranu i sigurnost BiH i
- Željko Grubešić, savjetnik u Zajedničkoj komisiji za odbranu i sigurnost BiH.

Sjednicom je predsjedavao Branko Zrno.

Za sjednicu je predložen sljedeći

DNEVNI RED

1. Obraćanje Brusa McLaina, savjetnika glavnokomandujućeg Štaba NATO-a u BiH;
2. Usvajanje zapisnika 1. i 2. sjednice Zajedničke komisije za odbranu i sigurnost BiH;
3. Razmatranje Prijedloga zakona o dopunama Zakona o odbrani BiH (predlagači: poslanik Momčilo Novaković i delegat Slobodan Šaraba);
4. Razmatranje Prijedloga zakona o izmjeni Zakona o službi u Oružanim snagama BiH (predlagač: Vijeće ministara BiH);
5. Razmatranje zahtjeva general-majora Hajrudina Grabovice;

6. Informativno razmatranje Ažurirane liste zemalja pod embargom UN-a i EU na izvoz NVO (sačinilac: Ministarstvo vanjskih poslova BiH);
7. Informativno razmatranje Prijedloga britanskih diplomata za rješavanje problema decertificiranih policajaca BiH (sačinilac: Stalna misija BiH pri UN-u i Ministarstvo vanjskih poslova BiH);
8. Rezolucija Evropskog parlamenta o navodnom CIA-inom korištenju evropskih zemalja za prebacivanje i nezakonito zatvaranje zatvorenika (Ministarstvo vanjskih poslova BiH);
9. Tekuća pitanja:
 - a) Informacija sa sastanka predstavnika Zajedničke komisije s parlamentarcima i parlamentarnim izvještačima SR Njemačke;
 - b) Informacija sa sastanka predstavnika Zajedničke komisije i Brusa McLanea, savjetnika glavnokomandujućeg NATO-a u BiH;
 - c) Informacija o prisustvu predstavnika Zajedničke komisije ispraćaju pete rotacije jedinice OSBiH za uništavanje NUS-a u Irak;
 - d) poziv G.Marshall centra iz BiH za učešće na seminaru o temi: „Reforma pravnog i sigurnosnog sektora u BiH i zemljama Zapadnog Balkana“, od 18. do 22.juni 2007.;
 - e) poziv UNDP-a u BiH za učešće na radionici o temi:“Uništavanje malog oružja i municije“, Mostar, od 6.do 8. maja 2007.;
 - f) poziv Štaba NATO-a u Sarajevu za učešće na seminaru o „PFP/NATO Sporazumu o statusu snaga (SOFA)“, Neum, od13.do 18. maja 2007.;
 - h) poziv G.Marshall centra za sigurnosne studije i DCAF-a iz Ženeve za učešće Željka Grubešića na ljetnom seminaru u oblasti naprednih sigurnosnih studija, Garmisch-Partenkirchen, Njemačka,od 6. jula do 3. augusta 2007.;
 - i) Poziv Misije OSCE-a u BiH za posjetu predstavnika Zajedničke komisije Parlamentu i nadležnim radnim tijelima Crne Gore, od 15. do 18. maja 2007.;
 - j) Posjeta Glavnom uredu Granične policije BiH i Terenskom uredu u Višegradu.

Ad.1. Obraćanje Brusa McLanea, savjetnika glavnokomandujućeg Štaba NATO-a u BiH

Brus McLane predstavio je ulogu i zadatke NATO-a u BiH u proteklom, kao i periodu koji slijedi. Potencirao je neka važna pitanja koja BiH očekuju kao članicu PFP-a, a potom i NATO-a, istaknuvši određene načine, vrste pomoći i programe koje će NATO pružiti BiH na tom putu.

Sastavni dio ove tačke dnevnog reda i zapisnika je Presentacija Brusa McLanea, zato ovaj zapisnik ne daje poseban, detaljan komentar obraćanja.

Nakon prezentacije gosp. McLanea vođena je rasprava.

Šefik Džaferović potencirao je potrebu organiziranja informativne kampanje za najšire građanstvo o značaju članstva BiH u PFP, a potom i NATO-u. Iza te kampanje trebalo bi zajedno da stoje Parlamentarna skupština BiH i Štab NATO-a u Sarajevu. Gosp. McLane iskazao je spremnost za pomoć u toj aktivnosti.

Mirka Okolića zanimalo je pitanje visine budžeta odbrane od 2%. Gosp. McLane istaknuo je da je budžet od 2% predstavlja smjernicu, s tim da neke zemlje izdvajaju više a neke manje za tu svrhu.

Na svakoj zemlji je stoga pravo odlučivanja o visine sredstava koja će se izdvajati za potrebe odbrane. Pri tome je naglasio i da će NATO od BiH očekivati određeni doprinos kroz učešće u operacijama podrške miru i sl., što će iziskivati sredstva.

Nakon rasprave i izražene uzajamne zahvalnosti za mogućnost obraćanja i vođenja rasprave o ulozi NATO-a u BiH, završena je ova tačka dnevnog reda.

Ad.2. Usvajanje zapisnika 1. i 2. sjednice Zajedničke komisije za odbranu i sigurnost BiH

Zapisnici 1. i 2. sjednice Zajedničke komisije usvojeni su jednoglasno.

Ad.3.Razmatranje Prijedloga zakona o dopunama Zakona o odbrani BiH (predlagači poslanici-delegati: Momčilo Novaković i Slobodan Šaraba)

Momčilo Novaković je, u svojstvu predlagača Prijedloga zakona o dopunama Zakona o odbrani BiH, dao uvodno obrazloženje. Istaknuo je da je cilj ovog prijedloga zakona dovođenje u isti položaj lica u entitetskim ministarstvima odbrane, tj. nekadašnjim općinskim sekretarijatima odbrane, s pripadnicima OS, s obzirom da svi oni ostaju bez posla zbog provođenja reforme odbrane.

Branko Zrno istaknuo je da je Zajednička komisija u prethodnom sazivu, na sjednici održanoj 25.8.2006., razmatrala predmetni prijedlog zakona u svojstvu nadležne komisije, te usvojila zaključak kojim je od Vijeća ministara BiH zatražila da, najkasnije u roku od 10 dana, dostavi mišljenje o Prijedlogu zakona, kako bi Zajednička komisija potom održala svoju sjednicu i donijela odluku o predloženom zakonu. Kako u traženom roku Vijeće ministara BiH nije dostavilo mišljenje, upućena je urgencija za dostavu mišljenja 8.9.2006. godine. Ovo mišljenje neophodno je zbog finansijskih efekata Prijedloga zakona na entitetske fondove PIO/MIO.

Dužanka Majkić naglasila je da treba u svakom pogledu zaštititi državne službenike koji ostaju bez posla, jer to radi većina zemalja. Dodala je, međutim, da Prijedlog zakona ne treba obuhvatati i kategorije ostalih zaposlenika. Također, nije dato obrazloženje potrebnih finansijskih sredstava koja bi trebalo da prate ovaj zakon.

Sulejman Tihić izrazio je također rezerve u pogledu Prijedloga zakona, kao i svih drugih zakona koji iziskuju dodatna finansijska sredstva, uz isticanje potrebe da se vodi računa i o drugim kategorijama lica.

Hazim Rančić naglasio je da poziv na član Ustava u preambuli predloženog zakona nije u skladu s Ustavom, te je u suprotnosti i s obrazloženjem samog zakona. Također, u jezičkom i tehničkom smislu, zakon nije adekvatno obrađen i nedosljedan je.

Branko Zrno istaknuo je da su mišljenje o postojanju ustavnog osnova za ovaj zakon dostavile ustavnopravne komisije oba doma.

Nakon rasprave, i uz saglasnost predlagača Prijedloga zakona, članovi Zajedničke komisije jednoglasno su usvojili sljedeći **zaključak**:

„Od Vijeća ministara BiH traži se da, u neposrednim konsultacijama i saradnji s entitetskim vladama, u roku od 30 dana dostavi mišljenje o Prijedlogu zakona o dopunama Zakona o odbrani BiH, predlagača poslanika Momčila Novakovića i delegata Slobodana Šarabe, u cjelini, a posebno u dijelu finansijskih obaveza za entitetske fondove PIO/MIO koje bi proistekle njegovim usvajanjem.“

Ad.4.Razmatranje Prijedloga zakona o izmjeni Zakona o službi u Oružanim snagama BiH (predlagač: Vijeće ministara BiH)

I. Rasprava o principima Prijedloga zakona

Marina Pendeš dala je kratko obrazloženje Prijedloga zakona o izmjeni Zakona o službi u Oružanim snagama BiH. Istaknula je da je cilj ovog zakona očuvanje potrebnog broja vojnika u OSBiH i iznad 35 godina starosti, te da će krajem ove ili naredne godine početi proces prijema mladih vojnika.

Nakon kraće rasprave, članovi Zajedničke komisije jednoglasno su usvojili principe Prijedloga zakona.

II. Rasprava o amandmanima i Prijedlogu zakona u cjelini

Branko Zrno konstatirao je da je na Prijedlog zakona amandman uložila Dušanka Majkić, te da je preuzela još jedan tehnički amandman koji se odnosi na stupanje Prijedloga zakona na snagu u skladu s Jedininstvenim pravilima pravnog normiranja.

Amandman I.

Ovaj amandman predvidio je obavezu izvještavanja Parlamentarne skupštine BiH o broju vojnika, strukturi i drugim pitanjima jednom godišnje, što je, prema mišljenju Dušanke Majkić, potrebno radi provođenja parlamentarnog nadzora nad radom ministra odbrane.

U raspravi o ovom amandmanu učestvovali su: Sulejman Tihić, Branko Zrno, Hazim Rančić, Marina Pendeš, Jozo Križanović, Mirko Okolić, Slobodan Šaraba i Dušanka Majkić.

Sulejman Tihić i Šefik Džaferović smatraju da je takvo izvještavanje nepotrebno, a ako bi se već i prihvatila potreba za dodatnim izvještavanjem, naglasili su da je Predsjedništvo BiH institucija koja treba da bude izvještena o tim podacima, s obzirom da je donijelo Odluku o veličini i strukturi OSBiH. Nesporno je da treba postojati kontrola rada ministra odbrane, ali usvajanjem ovog amandmana, postojeći zakon postaje nekonzistentan.

S ovim mišljenjem saglasili su se i Jozo Križanović, Hazim Rančić i Marina Pendeš.

Hazim Rančić naglasio je i činjenicu da se u obrazloženju Zakona koje je dalo Vijeće ministara BiH govori isključivo o kategoriji vojnika, a da se ne pominju oficiri i podoficiri.

U odnosu na amandman, dodao je da bi takvom vrstom izvještavanja dobili iskrivljenu sliku jer se radi samo o jednom broju liča o kojem bismo dobili informaciju.

Drago Kalabić, Slobodan Šaraba i Dušanka Majkić bili su suprotnog mišljenja. Istaknuli su da je to vrlo osjetljivo pitanje koje mora biti transparentno i dostupno javnosti u svakom trenutku. Na ovaj način izbjebla bi se bilo kakva nepotrebna sumnja i rasprava o ovom pitanju.

Nakon rasprave, članovi Zajedničke komisije usvojili su amandman I., sa pet glasova „za“, jednim glasom „protiv“ i tri „suzdržana“, uz potrebnu većinu glasova članova iz oba doma, u sljedećem tekstu:

U članu 1., nakon stava (2), dodaje se novi stav (3), koji glasi:

"O imenima i prezimenima, nacionalnoj pripadnosti i broju oficira, podoficira i vojnika, te razlozima za produženje trajanja službe u OSBiH i nakon godina života predviđenih u stavu (1) tač. a), b) i c) ovog člana, Ministarstvo odbrane će jednom godišnje informirati Parlamentarnu skupštinu BiH."

Članovi Zajedničke komisije jednoglasno su usvojili amandman II., u sljedećem tekstu:

U članu 2., riječi: „sa danom“ zamjenjuju se riječima: „narednog dana od dana“, a ostali tekst ostaje isti.

Zajednička komisija potom je jednoglasno prihvatila tekst Prijedloga zakona o izmjeni Zakona o službi u Oružanim snagama BiH s usvojenim amandmanima, uz konstataciju da je Zakon neophodno donijeti, te predložila domovima Parlamentarne skupštine BiH njegovo usvajanje.

Ad. 5. Razmatranje zahtjeva general-majora Hajrudina Grabovice

Branko Zrno istaknuo je da je general-major Hajrudin Grabovica, koji je u međuvremenu penzioniran, dostavio pismo Zajedničkoj komisiji o načinu odlaska u penziju. Potom je dao riječ **Marini Pendeš** koja je detaljnije obrazložila ovaj slučaj.

Naglasila je da je, u skladu sa Zakonom, Predsjedništvo BiH donijelo odluku kojom se general-major Grabovica na vlastiti zahtjev upućuje u penziju. Ministarstvo odbrane BiH posjeduje cijeli

predmet vezan za navedeni proces i razloge penzioniranja. Istaknula je da su protiv general-majora Grabovice vođene tri istrage u periodu 2005.-2006. godina. Jedna istraga odnosila se na ispitivanje navoda o unapređenju lica iz Ministarstva odbrane FBiH suprotno propisima. Druga istraga pokrenuta je nakon dopisa ministra odbrane RS-a o angažiranju jedinica Vojske FBiH na teritoriji RS-a radi izvođenja radova na sanaciji lokalnog puta u okolini Rogatice, a što je suprotno važećim uputstvima o angažiranju snaga. Treća istraga vođena je u vezi s raspolaganjem vojnim stanovima u vlasništvu fonda FBiH mimo zakonskih odredbi. I od NATO-a i EUFOR-a dostavljena su u nekoliko navrata upozorenja da će general Grabovica biti smijenjen ukoliko sam ne podnese zahtjev za penzioniranje, a u tom slučaju njegova pozicija bila bi mnogo gora. Na kraju je istaknula da navodi generala Grabovice o djelovanju načelnika ZŠOSBiH, generala Sifeta Podžića i Rizve Pleha, generalnog inspektora, u potpunosti nisu tačni.

Drago Kalabić rekao je da bi bilo potrebno članovima Zajedničke komisije dostaviti postojeću dokumentaciju kojom raspolaže Ministarstvo odbrane BiH o ovom slučaju i zatražiti informaciju od Predsjedništva BiH, kako bi mogli valjano odlučivati. Problem je u samom tekstu i navodima iz pisma, te bi bilo neophodno pozvati generala na narednu sjednicu Komisije radi davanja obrazloženja navoda.

Branko Zrno istaknuo je da je u ovom slučaju u pitanju radnopravni status lica, te da bi ova komisija u tom kontekstu trebalo da ga posmatra.

Šefik Džaferović naglasio je da je ovo prvi slučaj kojim se jedan general obraća Zajedničkoj komisiji sa svojim viđenjem problema. Zato bi bilo dobro da Komisija prilikom razmatranja ovog slučaja zauzme stav kojeg će se držati u daljnjem radu. U konkretnom slučaju smatra da bi trebalo pozvati generala Grabovicu na narednu sjednicu Zajedničke komisije, kako bi obrazložio navode iz svog pisma. Također bi od Ministarstva odbrane BiH trebalo tražiti izjašnjenje.

Sulejman Tihiić istaknuo je da je upoznat s ovim slučajem u kojem je bilo kršenja pravila službe, ali ne u tolikoj mjeri da bi general Grabovica bio smijenjen. Naglasio je da je razgovarao s generalom Grabovicom i iz tog razgovora stekao utisak da je odlaskom u penziju ovaj slučaj završen. Nakon dostavljenog pisma smatra da bi s generalom Grabovicom trebalo vidjeti da li ostaje kod navoda iz pisma ili ne.

Marina Pendeš naglasila je da je general Grabovica već penzioniran i da se ne može aktivirati na vlastiti zahtjev. Ukoliko bi se njemu sada dala takva mogućnost, to bi otvorilo put i drugim generalima koji su iz sličnih razloga penzionirani od 1995. godine i nadalje. Ponovila je da su, u konkretnom slučaju, Ministarstvo odbrane BiH i Predsjedništvo BiH, radili u skladu sa zakonom, te da će Parlamentarnoj skupštini BiH u proceduru brzo biti dostavljena i nova odluka na potvrđivanje imenovanja određene grupe generala. U okviru te grupe generala, za koju je privremenu saglasnost za imenovanje dao i EUFOR, nalazi se i general koji treba zauzeti dosadašnju poziciju generala Grabovice.

Dužanka Majkić istaknula je zabrinutost i zaprepaštenje nakon informiranja o navodima iz pisma o vršenju određenih pritisaka na generala Grabovicu. Mišljenja je da se Zajednička komisija ne može oglušiti na ovo pismo, te da bi bilo neophodno pozvati generala na narednu sjednicu Komisije radi davanja potrebnog obrazloženja.

Šefik Džaferović zapitao se kako raditi dalje ukoliko Komisija odluči ići u daljnju proceduru i šta predložiti Parlamentu. Potom je predložio **zaključak**, koji je identičan prijedlozima većine prethodnika, da se general Grabovica pozove da, ako želi, prisustvuje sljedećoj sjednici Zajedničke komisije, pri čemu će ga pitati da li ostaje kod datih navoda iz pisma i time zahtijeva da Zajednička komisija nastavi proceduru po tom aktu.

Predloženi zaključak članovi Zajedničke komisije usvojili su jednoglasno.

Ad.6. Informativno razmatranje Ažurirane liste zemalja pod embargom UN-a i EU na izvoz NVO (sačinilac: Ministarstvo vanjskih poslova BiH)

Nedžad Hadžimusić dao je kratko obrazloženje Ažurirane liste zemalja pod embargom UN-a i EU na izvoz NVO, koja je urađena u skladu s propisanim međunarodnim ugovorima i konvencijama u toj oblasti. Ova lista ažurira se po potrebi i o njoj se redovno izvještava Zajednička komisija. Mirko Okolić istaknuo je da bi informacije ove vrste trebalo da budu detaljno obrazložene s pozivom na potrebne akte.

Nakon rasprave, članovi Zajedničke komisije primili su k znanju Ažuriranu listu.

Ad.7. Informativno razmatranje Prijedloga britanskih diplomata za rješavanje problema decertificiranih policajaca BiH (sačinilac: Stalna misija BiH pri UN-u i Ministarstvo vanjskih poslova BiH)

Nedžad Hadžimusić informirao je ukratko prisutne o Prijedlogu britanskih diplomata za rješavanje problema decertificiranih policajaca BiH. Istaknuo je da će vrlo brzo doći do rješenja njihovog problema. Postojalo je nekoliko prijedloga za rješavanje ovog slučaja. Postojao je prijedlog Sekretarijata Vijeća sigurnosti UN-a o tzv. mekom rješenju, kojim se zabrana zapošljavanja decertificiranih policajaca ne bi odnosila na zapošljavanje u zaštitarskim agencijama. Britanski diplomati pak predlažu da se radi revizija ali bez spominjanja tog termina, te da policajci ponovo apliciraju na pozicije na koje žele. O ovom prijedlogu treba dogovoriti još neke sitnije detalje. O prijedlogu je upoznato i Vijeće ministara BiH koje je zadužilo Ministarstvo za ljudska prava i izbjelice i Ministarstvo vanjskih poslova da sačine potrebno pismo koje će biti upućeno Vijeću sigurnosti UN-a radi izrade predsjedničke izjave. To je već urađeno i pismo je uručeno generalnom sekretaru UN-a.

Hazima Rančića zanimalo je da li postoje konsultacije o ovom slučaju i prijedlozima rješenja s Udruženjem decertificiranih policajaca, te koje bi eventualno zakone i propise trebalo promijeniti kako ne bi bilo njihovog kršenja.

Nedžad Hadžimusić istaknuo je da se bivši ministar za ljudska prava i izbjeglice Kebo, u nekoliko navrata, sastao s predstavnicima navedenog udruženja, te da je to ministarstvo sačinilo nekoliko demarša. U ovom slučaju pomogao je i OHR djelujući prema Vijeću sigurnosti UN-a. Decertificirani policajci upoznati su i saglasni s predloženim rješenjem problema. U odnosu na broj zakona koje bi trebalo izmijeniti, istaknuo je da je to pitanje u nadležnosti Ministarstva pravde BiH.

Nakon rasprave, članovi Zajedničke komisije navednu informaciju primili su k znanju.

Ad.8. Rezolucija Evropskog parlamenta o navodnom CIA-inom korištenju evropskih zemalja za prebacivanje i nezakonito zatvaranje zatvorenika (Ministarstvo vanjskih poslova BiH)

Nedžad Hadžimusić obrazložio je ukratko i ovu tačku dnevnog reda. Ova tačka zanimljiva je BiH prije svega zbog „Alžirske grupe“. Pitanje te grupe trebalo bi biti u skorije vrijeme konačno završeno, s obzirom da zatvor u Gvantanamu treba da bude zatvoren. Stoga su upućene poruke svim zemljama čiji su državljani tamo zatvoreni da se broj zatvorenih lica treba smanjiti. Od šest lica koja su iz BiH zatvorena, trojici je osporeno bh. državljanstvo. Međutim, sugerira se humani aspekt rješenja problema u smislu da svih šest bude vraćeno u BiH, a da se potom razriješe pravna pitanja za navedena tri sporna lica. SAD su izjavile da ni za jedno od tih lica nije utvrđena krivica.

U kontekstu ovog pitanja je i Rezolucija Evropskog parlamenta o navodnom CIA-inom korištenju evropskih zemalja za prebacivanje i nezakonito zatvaranje zatvorenika. U ovom slučaju potrebna je hitna diplomatska akcija jer su SAD spremne isporučiti navedena lica.

Navednu rezoluciju s datim informacijama članovi Zajedničke komisije primili su k znanju.

Ad.9. Tekuća pitanja:

a) Informacija sa sastanka predstavnika Zajedničke komisije s parlamentarcima i parlamentarnim izvještaičima SR Njemačke

Članovi Zajedničke komisije primili su k znanju Informaciju sa sastanka predstavnika Zajedničke komisije s parlamentarcima i parlamentarnim izvještaičima SR Njemačke, održanog 10.4.2007.

b) Informacija sa sastanka predstavnika Zajedničke komisije i Brusa McLane, savjetnika glavnokomandujućeg Štaba NATO-a u BiH

Članovi Zajedničke komisije primili su k znanju Informaciju sa sastanka predstavnika Zajedničke komisije i Brusa McLanea, savjetnika glavnokomandujućeg Štaba NATO-a u BiH, održanog 11.4.2007.

c) Informacija o prisustvu predstavnika Zajedničke komisije ispraćaju pete rotacije jedinice OSBiH za uništavanje NUS-a u Irak

Članovi Zajedničke komisije primili su k znanju Informaciju o prisustvu predstavnika Zajedničke komisije ispraćaju pete rotacije jedinice OSBiH za uništavanje NUS-a u Irak.

d) Poziv G.Marshall centra iz BiH za učešće na seminaru o temi: „Reforma pravnog i sigurnosnog sektora u BiH i zemljama Zapadnog Balkana“, od 18. do 22.juna 2007.

Na poziv G.Marshall centra iz BiH za učešće na seminaru o temi: „Reforma pravnog i sigurnosnog sektora u BiH i zemljama Zapadnog Balkana“, koji se u dvije sesije održava od 18. do 22.juna 2007. , članovi Zajedničke komisije odlučili su da ovom seminaru prisustvuju:
I sesija od 18.do 22. juna 2007. - Hazim Rančić, Mirko Okolić i Jozo Križanović;
II sesija od 20. do 22. juna 2007. - Adem Huskić, Drago Kalabić i Ivo Miro Jović.

e) Poziv UNDP-a u BiH za učešće na radionici o temi:“Uništavanje malog oružja i municije“, Mostar, od 6. do 8. maja 2007.

Članovi Zajedničke komisije odlučili su da radionici UNDP-a o temi: „Uništavanje malog oružja i municije“, u Mostaru, od 6.do 8. maja 2007., prisustvuju Branko Zrno i Adem Huskić.

f) Poziv Štaba NATO-a u Sarajevu za učešće na seminaru o „PfP/NATO Sporazumu o statusu snaga (SOFA)“, Neum, od 13.do 18. maja 2007.

Članovi Zajedničke komisije odlučili su da po pozivu Štaba NATO-a u Sarajevu, na seminaru o temi „PfP/NATO Sporazumu o statusu snaga (SOFA)“, u Neumu, od 13.do 18. maja 2007. prisustvuju Vinko Zorić i Adem Huskić.

h) Poziv G.Marshall centra za sigurnosne studije i DCAF-a iz Ženeve za učešće Željka Grubešića na ljetnom seminaru u oblasti naprednih sigurnosnih studija, Garmisch-Partenkirchen, Njemačka,od 6. jula do 3. augusta 2007.

Članovi Zajedničke komisije odobrili su učešće Željka Grubešića na ljetnom seminaru iz oblasti naprednih sigurnosnih studija u trajanju od jedne sedmice, od 6.do 13. jula 2007., u Njemačkoj.

i) Poziv Misije OSCE-a u BiH za posjetu predstavnika Zajedničke komisije Parlamentu i nadležnim radnim tijelima Crne Gore, od 15. do 18. maja 2007.

Članovi Zajedničke komisije predložili su kolegijima domova da, svaki iz svoje nadležnosti, po pozivu Misije OSCE-a u BiH za radnu posjetu Parlamentu i nadležnim radnim tijelima Crne Gore, u vremenu od 15. do 18. maja 2007., donesu odluku o upućivanju sljedećih predstavnika ove komisije: Branka Zrne, Slobodana Šarabe, Hazima Rančića, Joze Križanovića, Drage Kalabića, Adema Huskića, Dragice Hinić i Željka Grubešića.

j) Posjeta Glavnom uredu Granične policije BiH i Terenskom uredu u Višegradu, 3. i 4. maj 2007. godine

Članovi Zajedničke komisije informirani su o tome da su izvršene konačne pripreme za predstojeću radnu posjetu Glavnom uredu GPBiH i Terenskom uredu u Višegradu, 3. i 4. maja 2007. godine, koje ova komisija obavlja u skladu s usvojenim Orijentacionim radnim planom za 2007. godinu.

U ovoj aktivnosti učestvovat će:

Branko Zrno, Slobodan Šaraba, Jozo Križanović, Adem Huskić, Mirko Okolić, Ivo Miro Jović, Drago Kalabić, Vinko Zorić, Hazim Rančić, te Šefik Džaferović koji će, zbog već preuzetih obaveza, učestvovati samo 3. maja 2007. godine, tokom posjete Glavnom uredu GP u Sarajevu.

Zapisnik sačinila
Dragica Hinić

Predsjedavajući
Zajedničke komisije
Branko Zrno